

Vun driweriver

erscheint auf www.lenauheim.de

monatliche
Erscheinung

Oktober 2019

von Helen Alba

De krallewatschiche Stopperzieher

Es war an eem Sunntach im Spotsommer. Korz vor em Mittachesse. Weil die Weinfässer im Keller schon gericht ware, for die Trauweles un de Moscht, is de letschte Wein in Glasflasche gfillt wore, die sin mit Korkstoppere fescht zugemacht gin un han ufm Stellasch gstann. De Vetter Michl ment: „Resi, ich hol e Flasch Wein ausm Keller. Such du inzwische de Stopperzieher. Zu dem Schweinsbradl gheert unbedingt e Glas Wein“! „Aso Michl, was heescht suche? De Stopperzieher leit uf seim Platz in der Schublad. Jo, geh nor um de Wein, ich trink ach e Spritzer“!

Un schun war die Flasch ufm Tisch gstann, de Vetter Michl schmaichelt se noch, weil es war eeni vun de letschte Flasche. Dann drickt er de Stopperzieher in de Korke un fangt an zu igeitle. „Sapperlot Weib, hascht de Korke zu tief in die Flasch gedrickt. Ich krien ne nit raus. Un der Stopperzieher, der is alt un krallewatschich. Hättscht schun längscht e neije kaafe selle“! „Wieso ich? Des wär doch dei Sach, tät ich menne! Fahrscht doch jede Tach mitm Bizikl längscht des Eisegschäft“!

Alles Ziehe hat nix gholf. De Korke hat anfang zu verbreckle un zuguterletscht hat de Michl ne nin in die Flasch gedrickt. Mit eem Teeseijer un Trechter han die zwaa de Wein dann in e anri Flasch umgeschitt. Doch de Michl hat jetz an dem Stopperteel gewurschtelt, des wu in der leeri Flasch geblieb is. Mit eener Wollschnur is es em dann gelung, de halwerte Korke rauszuziehe. Dernoh hats Esse un ach de Wein gschmeckt!

E Bussl un e Ansichtskart

„Lang, lang is es her“.... erinnert sich es Nantschi aus eem Banater Heidedorf.

„Ich war Großmädl, also schun aus der achti Klass ausgeblieb. Ich war in Temeschwar in der Lehr for Schneiderin. In de Freien awer immer derhem ufm Dorf. Uner der Wuch war im Haushalt genuch zu tun. Ich han gheere gekocht un sauwer gemacht. Im Garte han ich nit hacke misse, doch beim Obst ernte un inleije, beim Paradeis-Inkoche war ich immer fleissich derbei. Owets sin mer ins Mosi gang oder han uf der Gass Velker-, Federball gspillt un mit de Kumrade verzählt.

Es Kathi war schun seit eh un je mei beschi Kumradin. Sunntachs war nohmittachs unser Ausgang ufs Sportplatz. Selmols is noch Großfeldhandballe gspillt gin un die Mädle han Galerie gemacht un die Sportler angefeiert. Die Gegenmannschafte sin meischt aus anre Banater Derfer kumm. Un weil's jo jungi Buwe ware, sin villi noh em Handballspiel geblieb un ufs Baal kumm. Schun ufm Sportplatz hats Kathi an eem scheene Sunntach nor uf de Moritz aus Warjasch gschaut un sogar de Warjascher Handballspiller die Daume gedrickt. Selmols sin mer bal in Verdruss mitnaner kumm, weil des sich doch nit gheert, dass mer mit anre Sportler als unsre halle tut.

Un dann ufm Baal, do hat de Moritz jo de erschte Tanz mitm Kathi getanzt, des hat sovill gheescht, dass er e Au ufs geworf hat. Un nit genuch dermit, er hat sogar es Kathi phaarmol zum Tanz ufgfordert, was vill bedeit hat. Weil unser Eltre sich angewehnt ghat han, frieher hem zu gehn, weil es Kathi un ich immer mitnaner vum Baal hemgang sin, war des ach in seller Nacht so. Mir han uns angephackt ghat un sin geeger hemzus. Es Kathi hat nor vun dem Moritz gschwärmt. Un ufmol war der hiner uns un hat gsaat, er will uns begleete. Ich sin, wie des sich jo gheert hat, vorewech gang. Un die zwaa sin staat hinenoh kumm. Wie ich derhem ankumm sin, ke Gspur vun de zwaa Verliebte.

Un am anre Tach hat es Kathi mer verzählt: `Es is mei grossi Liebe! Sogar e Bussl han ich kriet, es war mei erschtes. An Schlofe gar nit zu denke. Un stell der vor, de Moritz muss bal inricke. Doch er hat fescht versproch, dass er mer schreiwe werd`! Die Zeit is vergang, es Kathi hat zwar e Ansichtskart vum Moritz kriet, doch meh nimi vun em gheert“.